




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

APERILA 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

Faaauau e Faiaoga le Galuega tele sa faia e Faifeau ma o latou Faletua

O se vaega tele o le galuega faafaifeau mai lava i le amataga, o le a'oa'oina lea o alo ma fanau a le atunuu i le tusitusi ma faitautusi.

O uluai tusi na fai mo lea faamoemoe, o le Pi Tautau, poo le alefapeta faa-Samoa, o le Pi Muamua, ma le Tusi Oti.

tagata i na aso. Ua tatou le manatu mamafa iai i nei aso, a o aso ina ua faato'a faasino mai e misionare *faaauau itulau e 2*

O se mea fou lea mo o tatou

Ue! o le 'oti

O le au'upega, poo le tusi sa faaaogaina e faifeau ma o latou faletua e a'oa'oina ai le Gagana Samoa, o le "Tusi 'Oti". O le igoa *silasila itulau e 15*

O le Koniseti a Fetu o le Taeao ma Agelu

Ai ua misi ia oe le koniseti a Fetu o le Taeao. O le aufaipese e iai ma le au agelu. Ae le tuua'iina oe pe afai e te le'i silasila pe faalogo iai. Aua o le toatele lava o tatou e le'i

faaauau itulau e 15

Fea le Toeaina na avea le Taavale?

silasila itulau e 8



O ATA: Tama'ita'i pule o nisi o a tatou a'oga:

Pito i luga itu agavale -
Pule o le Kolisi a
Leulumoega Fou - Fauolo
Apevai Mataafa; luga -
Pule o le Kolisi a Teine i
Papauta - Rosita Lafi
Esera; lalo - Pule o le
Kolisi i Maluafou - Lasi
Tavae.



Polokalame o le Fono Tele - itulau e 11

Faaauau e Faiaoga le Galuega tele sa faia e Faifeau ma o latou faletua

mata'itusi, ma upu ua fau mai ai o le tatou gagana, ai lava se maofa o o tatou tagata. Ua liliu e misionare le tatou gagana tautala, i le gagana tusitusi, ma tatou faitau ai. Ai lava se ofo o o tatou tagata, ma mimita foi pe a iloa faitau upu ua tusia ai le tatou gagana tautala. Ou te manatua e a'u lo'u matua fiafia i le Tusi 'Oti ma le tala i le 'oti oloo iai, ma ou fia vaai ai i se oti; ma le povi po'a; ma le tama na alu e saulupo. E le fiu e faitau le tala i le 'oti o le a oso, e oso i fea? E oso i le lua. O le 'oti lea i le tusi faitau mo A'oga a Faifeau na mafua mai ai le tatou upu: 'Aue ua ma le oti!'

Ma o le fiafia o tamaiti e faitau le Pi Muamua ma le Tusi Oti, o le faatuputeleina foi lea o lo latou malamalama i tusitusi ma faitau le tatou gagana. Ma faasolo atu ai i le faitauina o le Tusi Paia ma tusitusiga manaia oloo tumu ai, ma tala i isi atunuu oloo ta'ua i le Tusi Paia.

E le'i taitai ona oo mai le telefoni! E le'i taitai ona oo mai le leitio! E le'i taitai ona oo mai le televise! E le'i taitai foi ona oo mai le meapu'eata ma le digital camera ma le telefoni fe'vea'i! A o le poto i faitau tusi ma tusitusi, o le uluai laasaga lava lea e ese mai ai i le na ona tautala ma faalogo ma iloa, o le faifeau ma lona faletua na la faia.

E ui lava o le faamoemoe autu o le a'oa'oina o le tusitusi ma faitau tusi, ina ia iloa ai ona faitau le Tusi Paia ma malamalama ai i le Tala Lelei na aumaia e misionare, peitai, o le tatalaina lava lea o faitoto'a o le poto salalau mo o tatou tagata.

Mai le amataga lava, se'ia oo mai i le vai tausaga o a matou augatupulaga a o matou talavou matou, o le tatou Ekalesia lava sa taulamua i le a'oa'oina o le gagana

tusitusi ma faitautusi. O le taimi lea e tusa o le 56% ma ona tupu o tagata Samoa, e lolotu LMS, (Lonetona Misionare Sosaiete), lea ua ta'u nei o le Ekalesia Faapotopotoga Kerisiano Samoa - EFKS talu mai le tausaga e 1962.

E ui lava sa iai a'oga a Malisi (Marist Brothers Schools) ma a'oga Taupousa (St. Mary's Schools) a le Ekalesia Katoliko, ae na o Apia sa iai i na aso, sa faaaogaina ai le Gagana Samoa ma le Gagana Peretania. A o Samoa atoa, sa tofua lava le alaalfaga ma le faifeau ma lona faletua. O la'ua ia sa la a'oa'oina fanau a le nuu, i le faitau tusi, tusitusi, faitau Tusi Paia, ma le malamalama i mataupu o le numera.

E leai ni a'oga a le Malo sa iai i nuu i tua. I le matou itumalo, na o le tasi pe lava le a'oga tulagalua sa iai. Faato'a a'ea'e tetele mai le faatuina o a'oga tulagalua i alaalfaga i tua, ina ua amataina le faiga faa-sikolasipi lea na amata auina ai tama ma teine mai a'oga tulagalua, e a'o'oga i Niu Sila i le tausaga e 1945. Ioe, o a tatou uluai sikolasipi e le'i o mai i ni kolisi poo ni a'oga maualuluga, aua e le'i iai ni a tatou a'oga faapea i na aso. Na su'e mai i a'oga tulagalua a nuu ma nai a'oga a Ekalesia sa iai pei o Maluafou e toatolu tama na faasikolasipi mai ai i le 1945, o Faalaga Pita Lakisoe (Afoa), o le tatou fuafanua pasi muamua lea mai Niu Sila, Ailao Imo lea na ave ma se tasi o uluai foma'i pasi mai Niu Sila a le tatou atunuu; ma Punivalu, o le tatou uluai inisinia taavale (mechanic) muamua lea. Ma isi tamaiti na faasikolasipi mai i A'oga a Faifeau.

Sa faigofie ona a'oa'oina e le faifeau ma lona faletua fanau a le atunuu, aua e leai ni mea faatosina sa iai e pei o leitio, televise, lakapi, netipolo ma isi, leai foi ni a'oga

tulagalua. E o uma lava tamaiti i le A'oga a le Faifeau, i le taeao ma le afiafi. E momoe ai nisi o fanau teine a le nuu i le maota e iai le faifeau ma lona faletua, ma nisi o tama e momoe i se fale i tua. E fai le lotu ma le faitau Tusi Paia i le afiafi i le taimi o faigalotu; e fai foi le lotu i le taeao faato'a taape ai i o latou aiga. I lo'u manatu, o se igoa e tatau ona mitamita ai le Ekalesia, le igoa, A'oga a le Faifeau.

Sa silafia lelei lava e le faifeau ma lona faletua tamaiti uma o le nuu ma o latou uiga, lelei pe leaga, vaivai pe malolosi faale-maufaufau. Aua o la'ua sa la si'isi'ia ma faatonutonu le faitau tusi ma le tusitusi a tamaiti, mai lava i lo latou laiti, seia oo ina tama ma teine matutua ma faasolo ai i le faataulele'a, ma nototane ma faiava.

Ou te manatua e a'u, i a'oga a faifeau sa ou a'oga ai, sa iai ma tamaiti mai aiga Katoliko, sa o atu e a'o'oga i le a'oga a le faifeau, e a'oa'o ai le latou faitau tusi ma tusitusi faa-Samoa. O tausaga ia sa fai fai upu ai i tagata e le iloa "tautala faa-Papauta" fai mai e "faatau suta le latou gagana - "E ke alu i fea?" Se'i o kakou kapua'i i le Akua. O oukou uma ga e kakau oga pokopoko gagei i le kakou kalagoaga..." Sa aliali le gagana *faatau suta* lea i felafolafoa'iga a le Palemene i ulua'i tausaga o le Tutoatasi o Samoa, ma sa fai ai upu a tagata faapea - "...leaga e le'i a'o'oga i A'oga a Faifeau...,"

Ua oo mai la i nei aso, ua iai a'oga maualuluga a le Ekalesia - Maluafou, Leulumoega Fou, Tuasivi, Nuuausala, Papauta. Ua sili i le 160 tausaga talu ona faatuina le Kolisi Faafaifeau i Malua. Ua iai foi ma le a'oga tusiata. O ia a'oga uma, e matua tele se tupe a le Ekalesia e alu ai. E latalata i le 50% o tupe o Taulaga a le Ekalesia i tausaga ta'itasi, e alu i le faatinoina o a'oga a le Ekalesia. O se vaega tele foi o lea
faaauau itulau e 4

O LE LAUGA

(mai le Sulu Samoa o Ianuari 1957)

saunia e Isaia F.F.A (Maluafou)

e sui ai le lauga mo Aperila 2014 e le'i taunuu mai

Matua: “A ‘ona o lau fetalaiga ou te tuu ifo ai le upega”. - Luka 5:5

Ua sili lava ona taitaiina i tatou i se afioga totino lava a Keriso o le Matai (Ao) o le galuega manu faato'a tatou manava mai galuega tiga o lena tausaga, a o le a tatou sauni atu foi mo fe'au fou o lena tausaga. Ua filifilia ai le faatonuga sa fai e Iesu lava i ana uo atoa foi ma le tali lelei ua sauni atu e i latou lava ia te ia, na latou maua ai le manuia. O lena: “A ‘ona o lau fetalaiga ou te tuu ifo ai le upega”.

Sa sauni atu e Iesu se lauga lelei a o ti'eti'e i le vaa o Simona Peteru. E moni lava sa faatatau i le motu o tagata e toatele upu lelei e tele. Ae ta'ape le toatele, ona ia faatatau ai lea o upu lelei totino i ana uo ua masani. Ua faapea lava lana masani, ua matua taua ma lelei ana lauga ua faasino i le toatele o tagata, ae peitai, ua faatatau e ia upu pito silisili lava ma le matua alofa naunauta'i i e sa masani ma ia ma alofofa ia te ia. Sa ia silafia lava le puapuagatia o Peteru ma e na latou iai i le po atoa, o lea foi na faatatau tonu ai ia te i latou na iai, upu alofa e faamafanafanaina ai i latou sa tautiga i le po atoa.

O i tatou ana uo, poo lana fanau ua fesea'i i le vaomatua o le lalolagi nei ua puapuagatia ai. Ia tatou mautinoa, ua alofa mai pea Iesu ma fia fesoasoani mai ia te i tatou ma fia faasino mai foi ia i tatou le ala tatou te manuia ai. I le, e ao ina mautinoa e i tatou o e ua alofofa ia te ia. Ua lelei ana apoapoa'iga ma faamafanafanaga mo isi e toatele, e ui i lea, a ua iai foi se feau totino ua finagalo ai Iesu e faasino tonu ia te oe poo i

tatou ta'ito'atasi. I le afai ua tatou lagona ma mautinoa, ua iai se feau faapena ua tuuina mai e Iesu ia i tatou - Fai loa! ‘Aua le faatamala! A lagona loa le siufofoga totino o Iesu ia i tatou, usiusita'i loa, aua oloo iai le manuia. E pei ona sa lagona loa e Peteru le siufofoga o Keriso - “Ia tuutuu ifo le upega i le loloto” - Fai loa! E ui ina vaivai; o lea foi na faatutumuina ai o latou vaa i le mau i'a na tali masae ai lo latou upega.

O i tatou o le ‘Au Kerisiano poo le aufaigaluega a Iesu - o la tatou fe'au totino lena:

(a) *Ia iloa le finagalo o Keriso.*

(e) *Ia faia loa; aua oloo iai le manuia.*

1. O le fetalaiga a Keriso - o le Pule aoao lea o le tagata Kerisiano.

Afai o se tasi ua tauto i luma o le malo o le a avea ma fitafita poo se tasi tofiga foi o le malo, o lea lava aso ma lea lava itula e amata ai ona noatia ona manatu i lalo o le pule poo le faatonuga a ona ta'ita'i, o le a taumafai e usitai i mea uma e faatonuina e ona ta'ita'i vasega.

O i tatou le Au Kerisiano ua a'oa'oina foi i lena itu. O le aso na amata ai ona tatou ta'utino atu i luma o le Atua poo matai faalegaluega o le a fai i tatou o ana auauna e usitai e fai lona finagalo, o lea lava le aso ua noatia ai o tatou manatu. E soo se mea e aliali mai ai le finagalo o Keriso poo sana fetalaiga, tatou te faia loa aua o lana fetalaiga o le pule aoao lea o le loto o le Kerisiano.

E tasi le mea - e moni na faigata ia i tatou ona matua mautinoa le finagalo o Keriso - E moni na faaali mai i le Tusi Paia, peitai, ua faigata nisi taofi e tele o le Tusi Paia ona malamalama lelei ia i tatou. A tatou tau su'esu'e atu iai, e peiseai e atili ai ona faigata ia i tatou. Mautinoa foi, e leai se tasi o e ua taumafai atu ia iloa le finagalo o le Atua o le a aunoa ma le tagi atu pea - *Le Alii e ua faigata lou finagalo ou te le mafaia. Ua maualuga ou te le ma taea. Ua loloto ou te le ma iloa. Ae poo faapefea? E ao ina tatou matua punonou atu i luma o le Atua ma le tatalo naunauta'i. “O lou finagalo atoatoa ua iai i lau Afioga ou te le malamalama ai, ia e faailoa ma faapupula mai ia te au. E ui i lea, ou te talitonu iai ma le loto faatuatua. E ui lava ina ua a'oa'o lelei mai i le Tusi Paia. E ui foi ina ua matua faasaga atu iai i suesuega ma le filiga, a ua faigata lava. Ou te le matua maua lava le atoatoa o le faatuatuga o iai. O lena, ou te faataatia atu a'u mataupu i lalo o ou aao alofa lo'u Matai ma le faatuatua ia ou mautinoa ai.”*

Aua o se tasi ua maua ana a'oa'oga mai le pule tauaso faaletagata, o le a faaseseina ai o ia lava; aua ua ia maua mai mai ana uo faale-tagata lava. Ae peitai, o le ua faataatia ona manatu uma i lalo o le faatonuga a Keriso, e le ma sese - o le a sa'o atoatoa ai. Aua o Keriso o le Poto o le Atua e faatutumuina ai.

O nisi aso ua o se mea faigata lava ia i tatou pe afai ua o eseese mataupu ua tatou tausisi iai faale-Tala Lelei, ma le taofi o nisi tagata ua fia a'oa'o mai ai ia i tatou i nisi mea ese o le tala ia Iesu, ona o nisi faatuatuga fou. E ui lava ina mata e aoga ia i tatou a ua tatou mautinoa e ta'ita'iina ai i tatou i le sese tele ma le valea. E le tatau lava ona tatou fai atu: o le a tatou fai lena, ma auai i lena mea a ua

faaauau itulau e sosoo ai

O LE LAUGA

mai le itulau e 3

tatou iloa o se mea sese.

O puapuaga poo soo se mea faigata e tupu mai ia i tatou, na o mea faapena e ta'ita'iina ai i tatou i le ala sa'o ma ia 'alo ese ai i mea uma e sese. Se'i tatou taito'atasi pea ma fai ane: "Lo'u Matai e, afai o le ala o le ususita'i i lou finagalo o le a oo mai ai puapuaga e tele ia te a'u ma maua ai mo a'u le sa'olotoga ia Keriso - poo le tigaina i le mativa, poo le faalealolofa o tagata, poo le tuua'iina pepelo e pei lava ona oo i le au uso anamua. Ua lelei, o le a ou talia e pei o lau fetalaiga - soo se mea lava e te finagalo ai, o le a ou faia lava."

Sa fai ane Ioane Paniani i le Faamasino na faasino ia te ia: "O le a ou tuu."

2. O le fetalaiga a Keriso o lo tatou faatonuga lea ua lava atoatoa.

(a) O lo tatou faatonuga i le faatuatua ia te ia. O le faatonuga a Keriso, ia tatou faatuatua ia te ia. Ia matua faia ma usitai iai. E le na o tatou le 'aufaigaluega, a ua poloaiina i tatou ina ia aoao atu i tagata i nuu uma o le lalolagi. O le feau totino a le Tala Lelei lenei: Ia outou o atu e fai nuu uma lava ma soo i le Suafa o le Tolu Tasi Paia. O le poloaiga foi lenei a Keriso. Ia outou faatuatua i le Atua. Ia faatuatua mai foi ia te au. A fesili ma faitio mai isi tagata - Pe aisea ea ona outou a'oa'o ai, ia faatuatua, ia faatuatua, tatou te tali atu - Na poloai mai le Tupu, ia tatou faia faapea. I le o lana fetalaiga, o lo tatou faatonuga lea ua lava atoatoa.

(e) O lenei autu foi e mafai ona faatonu i nisi itu e pei o talosaga. Ua faatonuina pea nisi talosaga e pei o le 'Au Taumafai ma le 'Au Leoleo. O nisi aso ua tauau lemu ifo ina pa'u, ua le lagona se manuia ua aliali mai, ua pa'u lea sauniga

ma lea sauniga, ua fia malolo e pei o le tali a Peteru. Ua aoina le po e leai ma se i'a e maua. Ioe, ua tatou manava nei ua ao se'i malolo ane teisi. O lenei ua tatou toe lagona nei ua fetalai mai Iesu, Se'i toe tuutuu atu lava le upega i le loloto i lenei tausaga. Se'i tatou toe tali atu lava - Le Alii e, ua aoina le po, ua le fiafia tagata ua solomuli le toatele ua leai se fua e maua - "**ae ona o lau fetalaiga ou te toe tuu ifo ai le upega.**"

(3) *Ia tausia le fetalaiga a le Matai e maua ai le tau faamaoni.*

O i tatou ua galulue mo Iesu, ua tatou iloa ua faaolaina i tatou, tatou te le taumate pe faaletonu pei o se mea aitalafu. E leai, a o le atoatoa o le alofa tunoa. O le na matua faatuatua e faia mea uma e tusa ma le fetalaiga a Keriso, o le a maua e ia le tau o le loto fuatiaifo e lelei.

O le a lona uiga? O le a tatou maua mai iina lava po ua tonu ma tusa ma le finagalo o le Atua, po ua tatou sese foi. Poo le a le fiafia mai tagata, ma tutupu faalavelave, ae o le a tatou iloa lava i lo tatou faamasino ifo, o le finagalo lava lea o lo tatou Matai, o le a tatou lagona lava pe faigata, fai pea, ma ia tauave pea e pei o se tasi vaega o le satauro faigata ua tataua ona

tauamoina e tagata Kerisiano uma. E sili mamao ina ia puapuagatia faapena i le ala o le finagalo o le Alii, i le tasi ala o le faafiafia i tagata.

I le ma lea foi, e sili lenei - E leai se tasi na te faia atoatoa le finagalo o lona Matai o le a aunoa ma le maua o le tau e silisili ona tele.

O Simona Peteru na maua le tau tele ona o lona usitai i le fetalaiga a Keriso, o vaa na faatutumuina i i'a e tele lava. O loo iai le manuia faula'i mai le Atua lava ua faatalitali mai mo i tatou lava, mo isi uma foi pe a tatou usitai e avea le fetalaiga a Keriso mo lo tatou Pule aoao.

Le Ekalesia e, ma le au faitau, ua manava a tatou feau i lona tausaga. O le a tatou sauni foi e toe tali atu pe se a se si'ufofoga mai lo tatou Matai i le tausaga nei. Pe iai se feau faapito mo i tatou taitoatasi, se'i tatou sauni foi e tali atu, e ui ina sa tatou tautiga i le galuega fita, a ia tatou ususita'i pea e tali atu:

"Le Alii e, ua aoina le po e leai se mea e maua, a ona o lau fetalaiga ou te tuu ifo ai le upega." Ma ia tatou faia loa; aua oloo iai le manuia ua finagalo ai Iesu mo i tatou uma ta'ito'atasi. Amene.

Faaauau e Faiaoga le Galuega tele sa faia e Faifeau ma o latou faletua

mai le itulau e 2

tupe, e alu i le tologi o faiaoga.

O le faamaoni o le aufaigaluega i faifeau ma o latou faletua i le faiga o A'oga a Faifeau i aso ua mavae, sa matua fesoasoani tele i le atiinaeina o le poto ma le atamai i tupulaga o tama ma teine, o fanau a Samoa. O latou na asa le vao filifili ma le gasu o le taeao o mataupu tau a'oa'oga i lo tatou atunuu. Ua sea sea ona manatua e Samoa lea itu i nei aso o lea ua lelei a'oa'oga. A o faifeau ma o latou faletua, o latou lava o ulua'i faia'oga i Samoa - amata mai i le

1840 pe a. O le mea foi lea ua ou tau faalogo ai i nisi o faapea, ona o le faaletonu o le gagana Samoa a tamaiti i a'oga a le malo, aisea e le talosaga ai i faifeau e toe a'oa'oina le Gagana Samoa ia latou a'oga?

I lo'u lava talitonuga, o le faaletonu o le Gagana Samoa a tamaiti i a'oga i nei aso, e mafua mai ona ua leai ni a'oga a faifeau e pei ona iai i la aso. Ua le tutusa le faiga o polokalame a a'oga a faifeau, poo a'oga foi a le malo, i aso nei, ma aso ua mavae. Ua

faaauau itulau e 9

MATINI LUTERU

1483 - 1546

O le Auupega o le Toe Fuata'i

faaauau mai le masina o Mati

O le tausaga e 1513 na amata su'esu'eina ai e Matini Luteru le tusi o Salamo, ma o le amata ai foi lea ona ia savali i le ala na ia maua ai se malamalama'aga na avea ma mea e faasa'olotoina ai o ia. O le Salamo e 22 na talepeina le faitoto'a ma amata maua ai se malamalama. Fai mai le Salamo lea e 22: "Lo'u Atua e, lo'u Atua e, se a 'ea le mea ua e tuulafoa'i mai ai ia te a'u, e taumamao ma lo'u faaolataga, o upu foi o lo'u faaitaio? Lo'u Atua e, ou te valaau ia te oe i le ao, ae te le faafofogaina mai; atoa foi ma le po, ua ou le mapu lava."

Na ofo Matini ina ua ia faitauina upu ia. Na lagona foi e Iesu le tuulafoa'iina o ia e le Atua, ma vavae'eseina. Ua sui nei le ata lea sa i le mafaufau o Matini e faapea o se Iesu e le alofa, ma oloo nofo o ia ma faamasinoina le lalolagi ma auina tagata i le malaia. Ua le o se Iesu nei e afio i le nofoalii o le faamasinoga, a o se Iesu o tautau i le satauro. Lea la ua toetoe lava a malamalama atoatoa Matini i le fingalo o le Atua Silisiliese. Ua ia iloa atu nei le alofa tunoa o le Atua na mafua ai ona tautau Iesu i le satauro.

Peitai, e le mafai lava ona alu ese ma lona mafaufau le ata o le Atua amiotonu o ia faamasinoina tagata e le amiotonu, o tagata e le mafai lava ona latou maua le amiotonu. Na ia malamalama e finagalo le Atua i le amiotonu, ae ui lava o lea ua amata ona ia malamalama i le alofa o le Atua, ae a mafaufau atu o ia i le faamasinoga tonu a le Atua, ona tetemu ai lea o ia.

Na o le Faatuatua lava

O lona faitauina o tusi a le

apostolo o Paulo, na amata ai ona malamalama Matini i le uiga o le amiotonu faapea ma le faamasinoga tonu a le Atua. Sa matua su'esu'e o ia i tusi a Paulo, ma taumafai e vanevane mai o latou uiga moni.

O se tasi o mea sa iloa i uiga o Matini, o lona faaaogaina lea o tusitusiga pa'ia e su'esu'e ai vaega uma oloo le mautonu ai o ia. Na ia ave ana fesili ma tuufaafegai ma tusitusiga a Paulo i tagata Roma ma Kalatia. O le vai taimi i le va o le 1515 ma le 1517, a o faia'oga o ia i tusi ia e lua o le Tusi Paia, na amata malamalama ai o ia i le uiga moni o le amiotonu a le Atua. Ina ua faitau Matini i le Roma 5:1 lea e fai mai e ta'u amiotonuina le tagata i le faatuatua, na oso a'e i luga lona ita. E le malamalama o ia i lea mea. O lona naunauta'i ina ia malamalama o ia i le uiga moni o lea mea, o lea na ia su'esu'e ai i tusitusiga i le gagana Eleni e saili mai ai le uiga moni o le upu amiotonu. Na ia maua ai le uiga o le upu amiotonu, o le matua faamamaluina lea o le tulafono ma faatino faasalaga, lea lava sa mua'i talitonu o ia iai. E foliga mai lava la i le manatu o Matini Luteru, ua malaia lava la le tagata.

Peitai o le uiga o le upu ta'u amiotonuina i le gagana Eleni, lea ua maua ai e Matini se mapusaga. Ta'u amiotonuina e le tutusa ma le upu amiotonu. O le ta'u amiotonuina ua faamatala mai ai se mea o fai a o faataatia ese se faasalaga. O le ta'u amiotonuina o se faiga ina ia mafai ai ona toe 'apo mai le tagata i le Atua ma toe faaolaina.

Lea la ua malamalama Matini Luteru. E le'i saili le Atua e

faamalaia le tagata, ae ia faaola le fanau a tagata ma toe tuuina atu se avanoa mo latou.

Ae sili atu i lo se isi lava mea, ua mautinoa nei e Matini, e oo lava i lea faiga o le toe faafouina, ma le faamoemoe i le faafouina, o le a le avea lava lea ma ala e talia ai le tagata i luma o le Atua. Na o le faatuatua. O le faatuatua o le meaalofa, ma ona o le faatuatua o le tagata, lea ua ta'u amiotonuina ai o ia. E faigofie lava, na o lou talitonu i le galuega o le faamagaloga na faia e Iesu, o le a avanoa ai lana amiotonu mo oe. Ua fai nei le leleiga o le tagata ma le Atua, e ala ia Iesu Keriso. O le faatuatua i le galuega na faia e Iesu i luga o le satauro ua lava lava lea mo le fanau a tagata. O le Atua o le Uo mo tagata uma.

O le tuu faatasi o ia talitonuga i le amiotonu a le Atua faapea ma tusitusiga pa'ia, "e ola le tagata amiotonu i le faatuatua". - Roma 1:17, ua tula'i mai ai se mataupu silisili, peitai e le'i vave ona malamalama iai. O le tatalo, ma su'esu'e mo ni tausaga se fa na faatupuina ai le malosia o lea faaaliga.

Fai mai Matini Luteru: 'O lea la, ina ua te'a se taimi o talosaga, i le po ma le ao, faapea ma le alofa ma le agalelei o le Atua, na amata ai ona ou malamalama, o e ua ta'u amiotonuina e ola i le meaalofa a le Atua ua ta'ua, o le faatuatua. O ina na ou lagona ai e pei ua ou toe fanau mai ma ua ou ulu atu i parataiso i faitotoa ia ua tatala mai."

I le Faleuila?

O se vai taimi i le va o le tausaga e 1518 ma le 1521, na oo mai ai ia Matini Luteru le faaaliga mulimuli, ma o lea faaaliga na amata ai se tetee tele.

A o o'u su'esu'e i le soifua o nisi o Kerisiano faatuatua iloga, faapea ma le mea moni na latou aumaia, ma le mana na latou galulue ai, ou *faaauau itulau e sosoo ai*

MATINI LUTERU

te talitonu e lelei pe a e malamalama, o le amataga o se tetele tele, e mulimuli mai i mulivae o le loto vaivai ma le mapuitiga. E pei ona oo ia Matini Luteru, pe sailiili foi i tala i soifuaga o nisi o le au fai evagelia, o le toatele o i latou ua toetoe tuu i le tuugamau ae te'i ua toe oso mai le malosi faafouina ma latou faia ai ni mea uiga ese i o latou toe taimi.

Na faamatalaina e Matini Luteru aso nai luma mai o le tetele tele na tula'i mai faapea na matua faavaivai lava o ia. Se'i faaogaina pea le upu na ia faaogaina. Fai mai a ia sa i le "cloaca" poo le 'toilet' i le gagana Peretania, poo le "faleuila". Na faaogaina e Matini lea upu e faamatala ai ona lagona i lea taimi.

O i latou e tusia tala faasolopito latou te ta'ua lea vaega o le olaga o Matini o le taimi o se suiga mai le le mautonu i le sa'olotoga, ma o le taimi lea o le mapuna a'e o faiga fou faaevagelia. I lea lava vai taimi, o le fuaitau "o le amiotonu a le Atua", ua maua mai ai se fiafiaga tele i le agaga, ae le o le ita.

E toetoe lava ina a e lagonaina le filemu o le Atua i le loto o Matini a o ia tusia upu nei:

Afai e iai moni sou faatuatua o Keriso lou Faaola, o le a e maua le fiafia o le Atua, aua e taitaiina atu oe e le Atua ma tatalaina ai le finagalo o le Atua, ina ia e vaai ai i le alofa tunoa ma le alofa anoanoa'i o le Atua e le ma faamatalaina. O le a e maofa ai i le Atua, i le faatuatua, ma e vaavaai atu ai i lona itu faatama, faauo e le maua ai se ma'ema'ea poo se agaga to'atama'i.

O ona popolega e uiga i tevelo sa iai a o talavou o ia, ua fo'ia nei ina ua ia maua se faamaninoga fou. O taua uma sa feagai ma ia ua gata nei i le satauro. Ua fai le satauro ma mea na te iloa ai le alofa tunoa

o le Atua. I le satauro, ua ia iloa atu ai le manumalo o Keriso ia Satani ma ana temoni.

Ua ia Tu'itu'i i le Faitoto'a o le Malumalu lana Faaaliga

Ina ua amata ona vaai Matini i le faaaliga ma le moni o le faamagaloga a le Atua, ona ia iloa ai loa lea o le sese o le Ekalesia Katoliko. Na matua faanoanoa o ia i uiga sese ma le pi'opi'o, o lea na ia ta'utino ai loa, o le a ia taumafai e ta'ita'iina mai le Ekalesia i le malamalama, ma ta'utino foi o le a ia tautala malosi ma taumafai e liliu'ese mai tagata mai le ala sese lea ua latou ui ai.

Sa ou faatusaina muamua ia **indulgences** o se faamaoniga o se faatau ua fai poo se lisiti o se faatauga.

(INDULGENCE = o ni tupe, poo se mea e faia, poo se galuega e faia e le tagata ina ia faaitiitia ai, pe faamagaloina ai, lana agasala. O le a faaogaina le upu TOGISALA).

O le maua o le Togisala o le maua lea o se pepa ua tusia e faaaliga ai pe o le a le tulaga siitia ua oo iai le Togisala, e faalagolago i le mea na fai e le tagata ina ia maua ai. A o le mea lava e masani ai, e faia e le tagata se galuega ina ia maua ai le Togisala. O taimi e mana'omia tele ai, e pei o le tau sailia o ni tupe mo Crusades (Taua Pa'ia), na faatauina atu ai Togisala i tagata e aunoa ma ni galuega e latou te faia e pei o le asiasi atu lea i Roma. Seia oo i le taimi o Pope Leo X, lea na ia matua faaogaina ai lea faiga ina ia saili ai ni tupe mo le fausia o le malumalu ta'uta'ua i Roma o le St. Peter's Basilica. Na moomoo Leo ina ia ave'a o ia ma pope na te faamae'aina lea malumalu. O le malumalu e matua taugata ma e na matua maualuga ai lava aitalafu a le Vatikano. Na tofia e Leo le akiepipoko fou o le

aai o Brandenburg na te faia le faatauina atu o Togisala. Ona filifilia ai lea e le akiepipoko le patele o Tetisele, e lelei i mea faapisinisi, na te vaaia lea itu. Sa malaga o ia e pei o se tupu i le taavale solofanua teuteuina manaia, ae taumulimuli atu ai tagata, seia oo ina taunuu le solo tele i le ogatotonu o le aai. O ina e faatu ai i luga e Tetisele se koluse lapo'a oloo faapipii ai le faamaufaailoga a le pope, ma amata ona lauga e faapea, e tasi le totogi ae mafai ai e le aiga ona faasa'oloto mai o latou aiga ua malilili ma oloo i pulekatolio.

E alaga o ia, "Ua valaauina outou e le Atua ma Sagato Peteru. Manatu i le faaolataga o o outou agaga ma o outou aiga ua malilili. Tou te le popole, ona o le mau faaososoga, ina ne'i te'i ua tou le sao i le lagi? Faalogo i le alalaga mai o o outou aiga ua malilili: "Na matou fanaua outou, fafaga outou, tausii outou, fai a matou mavaega e tuuina atu ai le tele o le 'oa mo outou. Tou te le alolofa mai ma faasa'oloto matou mai pulekatolio?" O le tala a Tetisele sa fai e faapea: "O le taimi lava e tatagi ai tupe i le pusatupe, e osooso fiafia ai le agaga i pulekatolio.

Na matua popole Matini ina ua ia iloa lenei mea. I lea taimi e le'i tetele malosi o ia i Togisala, ona e le'i atoatoa lona malamalama i lea mea i lea taimi, ae ui lava i lea, e le'i fiafia o ia i le faia o ia mea.

O le mea lea, na tumau pea lona faamaoni i talitonuga o le Ituaiga o Aukusitino (Augustinian Order) lea e iai o ia, soo se galuega lava e faia e pei o le Togisala, poo le ta'uta'u o agasala, e tatau ona faavae i luga o le salamo. E tatau lava ona faamaoni le salamo o le tagata i ana agasala. O le mea lea, o le faatonuga mai le pope, (papal bull), lea ua faataga ai Tetisele na te faatauina atu Togisala e aunoa ma le salamo, ua misia ai e tagata se vaega

silasila itulau e sosoo ai

A Page for Youth

ITULAU MO TUPULAGA TALAVOU

Faatali! ‘Aua le maumaua lou ola!

Na fuafuaina e se faiaoga i Niu Ioka o le a ia faia se faaeaea i ana tamaiti a’oga sinia uma, e faailogaina ai le taua tele o o latou tagata ta’ito’atasi. Na ia valaauina ta’ito’atasi tamaiti a’oga i luma o le vasega, ma ia fai atu iai le aafia o lona tagata i ni uiga lelei mai lana vasega. Ona ia tuuina atu lea i tamaiti ta’ito’atasi uma, se lipine o tusia ai i mata’itusi auro upu nei: “O lo’u ituaiga tagata e maua mai ai se suiga.”

Mulimuli ane ona faia ai lea e le faia’oga se poloketi, e sailia ai pe o le a se aafiaga o tagata o le nuu pe a faalauiloa e taua i latou. Na ia tuuina atu i tamaiti a’oga ta’ito’atasi uma ni lipine se tolu, ma faatonuina i latou e o loa ma amata faalauiloa le latou taumafaiga. A mae’a lea ona latou toe saili lea i mea na latou faia pe

o le a se tulaga ua oo iai, pe a te’a se vaiaso se tasi.

Na alu se tasi o tama a’oga ma feiloa’i atu i se sui pule i se tasi kamupani e lata ane, ma tuuina atu iai se tasi o lipine e faailogaina ai le taua o le mea na ia fesoasoani ai i le tama i le fuafuaina o sa na galuega mo le lumana’i. Na ia faapipii le lipine i le ‘ofu i luma tonu o le fatu o le sui pule. Na ia tuuina atu foi isi lipine e lua ma fai i le sui pule, e alu e saili se isi na te faia iai le mea lea ua ia faia ia te ia, a uma ona tuu foi lea iai le lipine o totoe ma fai iai e alu e fai le mea lea i se isi tagata. Se aso lata mai ona ta’u mai lea i le tama pe o le a se mea ua tupu.

I se taimi mulimuli ane i le aso lea, na alu ai le sui pule i lona pule, o se tagata saua ma le palauvale ma faa’u’u, ma fai iai e ese lona fiafia i mea e fai e le pule mo le aufaigaluega, oloo iloa ai lona alofa i tagata faigaluega, lona potu ma lona faautauta. Na aliali lava le te’i o le pule. Na fai atu le sui pule pe na te talia lana lipine e avatu e faapipii i lona fatafata e

faailoa ai lona fiafia i mea o ia faia mo le latou kamupani. Fai mai le pule, “Ia ua lelei!”

Ona tago lea o le sui pule i le isi lipine ua tuu atu i le pule ma fai atu iai, “E mafai ona e ave le lipine lea ma avatu i se isi e te filifilia, ma e fai iai tala ia na ou fai atu nei ia oe, ma fai iai o le poleketi a tamaiti a’oga e saili ai pe o le a le aafiaga o tagata ia latou faiga lipine nei.”

O le po o le aso lena na taunuu ai le pule i lona aiga ma feiloa’i ma lona atalii e 14 tausaga ma fai atu iai, “E te iloa Sailui, e uiga ese le mea na oo ia te a’u i lo’u ofisa i le aso. Na sau le sui pule talavou ma fai mai ia a’u e ese lo’u potu ma lo’u lelei i le pulea ma faafoe o galuega a la matou kamupani. Ona ia tuuina mai ai lea o le lipine lea e pipii i le fatafata o lo’u ofu, fai mai e faailoga ai le amana’iaina e le aufaigaluega o o’u uiga lelei ma le alofa ia latou. Tuu mai foi ma le isi lipine lea ma fai mai ou te alu e fai i se isi tagata.”

“A o o’u foi mai i lo tatou aiga ina ua uma galuega, na ou tau mafaufau ai poo ai ou te tuuina atu iai le lipine lea na aumai e le sui pule talavou ia te a’u. Ona ou manatua ai lea o oe.

“O le tele o aso ou te fo’i mai i lo tatou aiga ma lo’u mata ita ma le le fiafia. Tele lava ina ou taunuu mai loa o’u ‘ote, faitau la’u pepa ae leai se taimi e faaavanoa mo oe, na o lo’u leotele pe a faaletonu ou togi i le a’oga. Ae leai lava sa’u mea e fai ou te fesoasoani atu ai ia oe ma lou tina. A o le po lena, tasi lava le mea lea ua ou mafaufau iai, o lo’u sau lea ta te nofonono ma ta talatalanoa fiafia e uiga i lau a’oga poo faapefea mai. Ma ou faaali atu ia oe lo’u atalii, e ese lo’u alofa ia oe, ma o oe le tagata e aupito sili ona ou alofa iai i le lalolagi, faapea ma lou tina. Faamagalalo mai a’u pe afai na o lo’u ‘ote, ‘ote, ‘ote, ae leai sa’u fesoasoani e fai mo oe. O le mea

faaauau itulau e sosoo ai

MATINI LUTERU

mai le itulau e 6

taua o le faaleleiga ma le Atua, o le salamo lea i agasala ua fai.

O le faavevesiina o le mafaufau o Matini e mea ia ua fai e Tetisele, faapea ma le faaoga sese e le pope o lona tofiga, o lea na amata tusitusia ai loa e Matini itu taitasi uma, ma fesili, e uiga i le faaogaina o Togisala. E mae’a ane lea faamaumauga, ua atoa le 95 le aofa’i. E ui lava e le’i atoatoa ona ia manino i faavae faale-TusiPaia o nisi o ona talitonuga, a ua le toe faatali Matini a ua alu ua faapipii i le faitotoa o le Malumalu o Castle i Wittenburg.

E le o se mea uiga ese lea mea na ia faia. O se faiga lava e masani ai tagata

ona latou faia pe a latou mananao e tosina mai tagata e faatalatalanoa ma finauina ni mataupu e tula’i mai. Sa le popole Matini i lona le malamalama lelei i nisi itu o mea na ia faapipii, ae ua faia lava ma lona talitonuga, e lelei lea e faaali mai ai finagalo o tagata ma saoloto ai e felafolafoa’i i ia mataupu taua. O le a avea lea ma mea e maua ai le mea tonu ma le sa’o. E le’i iai lava ma se masalosologa o Matini, o le mea ua ia faia, o le a avea o se lu’itau tele o le a luluina ai le Ekalesia Kerisiano atoa, talu mai vai taimi o Iesu ma le ‘au aposetolo.

faaauau i le Sulu o Me

A Page for Youth

ITULAU MO TUPULAGA TALAVOU

mai le itulau e 7

Faatali! ‘Aua le maumaua lou ola!

lea ou te mana’o ai e faapipii le lipine lea i lou fatafata e fai ma faailoga o le taua o oe i lo’u olaga. E le mafai ona ou ola e aunoa ma oe ma lou tina.”

Na te’i le tamaitiiti i tala a lona tama, ona amata tagi ai lea, ma oo ina tete ona tino ma ua matua tagi lava. Na vaai atu o ia i lona tama ma loimata o tafe ifo i ona alafau, ma fai atu i lona tama, “Papa, o taeao lea na ou fuafua ou te pule ai i lo’u ola, ‘ona e faapea a’u e te

le alofa ia a’u ma lo’u tina ona e na o lou ‘ote, ‘ote, ‘ote lava ma e ita ia ma’ua pei ma te le alofofa ia oe, ma leai ni mea lelei ma te faia mo oe. Faapea oe ou te le iloa lou sauva ia Mama, ma e sasaina lo’u tina i le tele o aso, ae na o le tagi o lo’u tina ma faato’ese ia oe ae fai lava. E te le iloa foi ‘ou te alu ma ‘ou faapuna i se potu ma ou tagi ai ona o lou soona fasi o Mama. O nisi foi aso ou te tagi ai ma ‘ou tautau ia oe ma ou fai atu ua lava, Papa, Papa, ua lava se ‘aua le sasaina Mama, ae te fasi lava lo’u tina. A o lea la ua ou iloa e te alofa ia a’u ma Mama. O le a ou le pule foi la i lo’u ola. Faafetai Papa! Ou te alofa foi ia oe! Ou te matua alofa lava ia oulua ma Mama!”

Ona alu atu ai lea o le tamaitiiti

ua fusi mai lona tama, ma la fetagisi faatasi. La te le iloa atu Mama o tu mai i fafo o le faamalama, o maligi foi ona loimata, ua savali mai, ma latou fusifusi faatasi.

Mai le Faatonu:

Ua tele sailiiliga ua faia e uiga i faafitauli i le va o matua ma a latou fanau, ua maua ai, o le leai o se taimi o matua e talatalanoa ai ma mafuta ma a latou fanau, faapea le tuufau o tamaiti e o i mea latou te mananao iai e aunoa ma se vaaiga lelei, ma le tuulafoa’i o tamaiti e nonofo na o latou i le fale ae o matua i mea e mananao iai, o nisi ia o mafuaaga o faafitauli e tula’i mai i le va o matua ma a latou fanau. O tamaiti e le mafuta felata’i ma matua, ma le vaaia lelei, o tamaiti ia e oo ina tula’i mai ai faafitauli e faanoanoa ai. ###

Fea le Toeaina na avea le Taavale?

Na fesuia’i kia o le loli tele e 65 futu le umi, e la’u ai penisini, o le loli oloo aveina e le tama’ita’i o Linda. Ua uma ona tuu le uta, a o lea ua aga atu nei i le nofoaga o tane tetele e teu ai le suauu mo le toe faatumuina o lana taavale ma fo’i ai i le mea na amata mai ai lana malaga. O le Aso o Tama, 19 Iuni 1993. Na ia faalogoina le manogi mama o le savili mai le sami o latalata mai, ua lelelelea ai lona laulu e gata i ona tau’au le uumi, o ufiufi ifo i lona pulou faa-kaupoe. Faato’a lua vaiaso talu ona savali i luma i se sauniga faa-evagelia, ma ofoina atu lona ola mo Keriso. Oloo ne’ene’e pea ona lagona ona o lona fiafia i le mea ua ia faia mo Keriso.

Ina ua amata saosasao le taavale a le tama’ita’i e 33 ona tausaga, ona uli atu ai lea o lana taavale i le laina i totonu o le motouei (motorway). Ae peitai, e le’i atoa se lua maila talu ona oso atu i le laina pito i totonu, ae faalava ane i ona luma se taavale taugata saosasao, o le Jaguar, ma faalavelave i lana taavale.

Na vave lava ona oso i le ita lagona o Linda, ‘o’omi vave le taofi ne’i lavea, vili i lalo le

faamalama o lana taavale ma valaau atu i le tamalaoa o aveina le Jaguar, “Valea! E te le iloa e ono tupu se faalavelave i lau mea lona na fai?” Ae ailoga o lagona mai e le tamalaoa lana valaau! Na toe uli tutu le loli tele a Linda i le isi laina o taavale ma avea ma mea ua taufai ‘e’e mai ai pu o taavale, aua e sa ona oso mai faapea lana taavale i le motouei. Na ona soso atu lava i luma o le taavale a Linda toe uli tutu loa i luma o le Jaguar lea e iai le ulugalii, ma taofi tutu loa le loli tele. Ua taufai ‘i’i taofi o taavale, ae manatua ai loa e Linda lana folafolaga ia Iesu o le a tuuina atu lona ola mo ia.

Na manavanava tetele Linda, ma faato’ese i le Alii, “Le Alii e, ua ou sese. Faamagalo mai a’u.” Na uli ese mai mai tua o Linda le Jaguar, ma alamu vave atu i luma ma nimo atu ai. O le taimi lona na vaai atu ai Linda i lana faata, o tuu mai ai ni leoleo auata se toalua o ti’eti’e mai ia la uilaafi, ma o la pulou uilaafi, ua mulimuli mai ia ia. “Oi se mala paga! E le taumate na iloa lelei mai e leoleo auata la’u mea na fai.”

Na te’i Linda ua oso mai i se fale lata ane i le

auata se leoleo a le Highway Patrol a Kalefonia, ma faasino mai e afe atu lana loli lapo’a i autafa ma ui atu i le nofoaga o lata mai e suesue ai e leoleo taavale. E tu lana taavale ae afe atu foi ma le isi taavale a leoleo ma tu atu i ona tua, ma pupuni ai le ala.

Na tatalo Linda, “Faamolemole le Atua e, o le a saisai a’u e leoleo.” Na savali mai le isi leoleo ma fesili mai ia Linda, “Faamatala mai lau mea na fai i le motouei.”

“O le a le uiga o lau fesili, leoleo?”

“Na e feosofa’i solo i le motouei ma ono lavevea ai taavale, lau taavale ma le Jaguar ma feoti ai nisi.”

“E mo’i, e iai se ma feeseeseaiga ma le avetaavale o le Jaguar, ae na toe faaosoa lana taavale ma alu saosasao ae le’i tu mai.”

Na valaau atu le leoleo lea i isi leoleo le la e tutu mai a la uilaafi i luma o le fale. Na mafauafau ifo Linda, na te le’i vaai i leoleo ia i le motouei. E le taumate o leoleo ia o le a molimau nei i lana mea na fai i le taimi na ita ai i le avetaavale o le Jaguar. Na savali mai le isi leoleo tino’ese, ma tu ma pipii mai i lona faitoto’a, ma tilotilo mai i totonu. Toetoe lava a mauu mai i totonu lona tino lapo’a, ma faanunumi ona mata ma lona muauulu, ma fai mai, “Fea o iai? Fea le tamalaoa?”

Faaauau e Faiaoga le Galuega tele sa faia e Faifeau ma o latou faletua

mai le itulau e 4

malosi foi le u'una'ia o le a'oa'oina o le Gagana Peretania, aua o le gagana faava-o-malo, ua aafia ai le Gagana Samoa, faapea ma isi gagana laiti a le lalolagi. Ma le isi, ua tele lava foi ina tatou tautala i le gagana Peretania i o tatou aiga. E taape mai foi tamaiti mai a latou a'oga, ua le tautala i le gagana Samoa, a ua tautala mai i le Igilisi. Sa faasasa foi ona tautala i le gagana Samoa i nisi tausaga ua mavae, e pei ona sa faia i le Kolisi o Samoa.

E tele le galuega sa feagai ma faifeau ma o latou faletua i le a'oa'oina o alo ma fanau a le atunuu i tausaga ua mavae ae le'i iai ni a'oga se tele e pei ona iai nei. I nei aso, o lea galuega tele ua lafo atu nei i faia'oga a le tatou Ekalesia (ma isi Ekalesia ma a'oga a le malo) latou te faia. E mamafa, aua ua le na o le Tusi Paia ma le Gagana Samoa, a o le Matematika, le English, le Social Science, Computer Studies, Economics, History,

Science, Commerce, Physics ma isi mataupu. Ae faamoemoe le Ekalesia, i le faamaoni o ana faia'oga i le faatinoina o a latou galuega. Manatua, o tupe o Taulaga i le Atua, lea e totogi ai tatou uma oloo faigaluega i le Ekalesia.

E le aoga le tusi pasi faafia'oga; e le aoga le tikeri tele - le BA, MA, poo le a lava le ituaiga tikeri o ia te oe; e le aoga, pe a e le faamaoni i le faiga o le galuega faafiaoga.

Ua matauina i lipoti le matua faamaoni o le toatele o faiaoga, ma ua siisii ai i luga le tulaga o a latou a'oga. Faamalo! Tou te lagona lava e outou le fiafia ona o lo outou faia lelei o a outou galuega. A oloo lipotia ai foi ma nisi e matua le faamaoni lava, ma avea ma mea e aafia ai le lelei o a'oga a tamaiti.

Ou te fiafia i se faaaliga na fai mai ia te a'u e se isi o tamalii iloga o le atunuu, o se faia'oga foi, e faapea, na ala ona vave ona feoloolo la'u nanu, ona na a'oa'oina lelei la'u faa-Samoa -

faitau tusi ma tusitusi, i A'oga a Faifeau. Ma o la'u foi mau lea, ana le lelei la'u a'oga i le A'oga a le Faifeau, ou te le maua le tele o manuia ua ou maua i nei aso. A o A'oga a Faifeau i la aso, e amata mai ia Fepuari se'ia oo i masina o Novema/Tesema, i tausaga uma. E ta le pate i le taeao, toe ta i le afiafi, mo le A'oga a le Faifeau, Aso Gafua e oo i le Aso Faraile, Fepuari e oo ia Tesema. E masani ona lua pate e ta, o le isi e ta ta'i tasitasi; a o le isi e taolo tatope. A o maatusi ma penimaa sa faaaogaina, e leai ni 'api ma ni penitala sa faaaogaina. A uma ona tusi a ta mataupu i le maa, ma uma ona toggi, ona tape lea ae toe faaoga mo le isi mataupu.

O le mea lea, a lelei ona a'oa'oina o le tamaitiiti i le A'oga a le Faifeau, pe afai o ave iai, e solosolo lelei foi ana a'oga, i a'oga a le Malo, poo a'oga foi a le Ekalesia. Toe lelei ai ma lana amio, ma manuia ai lona olaga i tausaga mulimuli ane.

Afemata Tunumafono
Apelu Aiavao
Faatonu Sulu Samoa

Fea le Toeaina na avea le Taavale?

"Leoleo, o le a lau fesili?"

"Fea le tamaloa lea sa avea le loli suauu lenei? E le taumate na tu lau taavale i se mea ma faasola le tamaloa na aveina lau loli suauu. E le o oe na iai i le foelui."

"Faamolemole lau Susuga, na o a'u sa avea le loli suauu. Ou te le avea foi ni pasese."

Ua lulu nei le ulu o le leoleo, ua faaletonu poo le a le mea a fai aua na vaai mai lava i le loli suauu o le tamaloa oloo i le foelui.

"O le tamaloa sa avea lau loli, e ulusina, ma uumi lana ava e sina foi." O le taimi lea e pei ua taavili ai le mafaufau o Linda, ma ofo, ma 'ata'ata. Na mafaufau ifo, sa i lalo le faamalama o lona faitotoa, e tatau lava ona iloa lelei mai ai e le leoleo o ia o le fafine, e uumi ma uliuli lona lauulu, ma o ia sa avea le loli suauu.

Fai mai le leoleo, "Ia, malie lou loto, ua sese

le vaai faapea au o se tamaloa ulusina lea sa avea le loli. Ua lelei, manuia le aso."

"Faafetai! Manuia foi le Aso o Tama." o le tala lea a Linda i le leoleo ma vili i luga le faamalama o lona faitotoa, ma oomi lona vae penisini.

Na toe oo loa i luga o le motouei, amata maligi ona loimata. Ua oso a'e nei i lona mafaufau, o le

Alii moni lava lea sa avea lana taavale. E leai lava ma se isi faamatalaga o lea mea. O le Alii moni lava. Ua toe afe lana taavale i autafa-ala, ma tagi ai ma mafaufau. Ua tafe ifo ona loimata ma matafi ai ana vali, ma talitonu, na lavea'i o ia e lona Alii.

Na fai lana tatalo, "Lo'u Alii e, e faapefea ona ou le alofa ia te Oe i lo'u olaga o totoe? Aoa'o mai a'u ina ia ou iloa ona onosai ma taofiofi lo'u ita. O le aso lenei, ou te toe tuuina atu ai lo'u tagata i lau Afio. Alofa faamagalalo mai a'u."

tusia e Jane Rumph
faamatalaina e Afemata T. Apelu Aiavao

Occupation

A little lad paused at the window for a last look at the starry heavens before he said his good-night prayers. "Mommy, will I go to heaven some time?" "Yes, dear, if you love Jesus." "And will you be there?" he asked again. "I hope so, and Daddy'll be there, too." The little fellow shook his head emphatically, "My Daddy won't be there; he couldn't leave the store."

O le Mafuaaga o le Pese: “O Love That Will Not Let Me Go” (O le alofa na te le tuulafoa’iina a’u.)

O se tasi lenei o pese na tusia i le tau faai’ui’uga o le seneturi e 19, e aupito sili ona fiafia i ai le ‘Au Kerisiano. O lenei pese e matua loloto ma faamomoi loto ona lagona. Ae a tatou mafaufau atu i le tagata na ia tusia, e tauaso! E matua tauaso lava. Na maua i nisi o ana tusitusiga oloo ia faapea ai, o lenei pese “o ni fua ia o ona mafatiaga ma puapuaga.”

Na fanau Siaosi Mafesone (George Matheson) i Sikotilani i le aso 27 Mati, 1842. Sa tau iloa mea i lana vaai i le taimi o lona laitiiti. Mulimuli ane ina ua ia ulufale i le Iunivesite o Kalasikau (University of Glasgow), na amata ai ona faasolosolo ina mou atu lana vaai ae faato’a 18 ona tausaga. Ae ui lava i ia mafatiaga, ae le’i taofia ai le avea o ia ma se tama a’oga atamai, ma i’u mai ai i le Iunivesite ma le A’oga Faafaifeau a le Ekalesia Sikotilani ma ni ona pasi mauaululuga na faaeaina ai o ia.

O le tausaga e 1886 na avea ai o ia ma faifeau o le St. Bernard Parish Church i Etiniporo, o se aulotu e 2000 le toatele o ona tagata. Na oo ina lauiloa o ia o se tasi o faifeau ma failauga ta’uta’ua o Sikotilani, aemaise lava i Etiniporo lea sa tumutumu atu iai tagata i ana sauniga uma i le fia faalogologo i ana lauga. E le’i faaipoipo Siaosi Mafesone i lona olaga atoa, ae sa lagolagosua lona tuafafine i ana galuega ma tau i ia, ma oo ina ia a’oa’o ai gagana Eleni, Latina ma le faa-Eperu ina ia fesoasoani ai i le galuega a lona tuagane tauaso.

E tele lava taumatematega na fai i le mafuaaga na ala ai ona tusia e lenei faifeau lenei pese. Ae mafuli lava masalosologa i le manatu, na mafua ona ua fulitua mai lana uo teine ia te ia, ina ua ia iloa o le a oo ina po atoa le vaai a Siaosi. E ui lava la e le’i faamaonia atoatoa

lea talitonuga, ae iai vaega i le pese e aliali mai ai fesoota’iga o ona tiga i le fulitua mai o lana uo teine i le taimi o lona faanoanoa ona o le a tauaso. E pei o le “sulu toetoe a mate”, ma le “o le ‘ave na nonoina mai”, ma le “o le nuanua i le timu”, ma le “satauro” i le fuaiupu mulimuli. Ae fiafia ona na ia tusia se tala i le mafuaaga na ia tusia ai lenei pese, ma e fai mai a ia:

“O la’u pese na fatuina i le maota i Inelani, i le afiafi o le aso 6 Iuni 1882. Na o a’u i le taimi lea. O le aso lea o le faaipoipoga a lo’u tuafafine, ma e na faatasitasi uma mai ai lo matou aiga i Glasgow. E iai se mea na tupu ia te a’u, na o a’u na ou iloa, ma e na ou matua mafatia ai lava. O le pese o le fua lea o ia mafatiaga ma atugaluga. O le tusiga o le pese o se galuega

O le Pese:

“O Love That Will Not Let Me Go”

O love that will not let me go,
I rest my weary soul in Thee;
I give Thee back the life I owe,
That in Thine ocean depths its flow
May richer, fuller be.

O Light that full’west my way,
I yield my flick’ring torch to Thee,
My heart restores its burrowed ray,
That in Thy sunshine’s blaze its day
May brightt-er, fair-er be.

O Joy that seek-est me thru pain,
I cannot close my heart to Thee;
I trace the rainbow thru the rain,
And feel the promise is not vain
That morn shall tearless be.

O Cross that liftest up my head,
I dare not ask to fly from Thee;
I lay in dust life’s glory dead,
And from the ground there
blossoms red
Life that shall endless be.

lea na matua vave lava ona ou faia i lo’u olaga atoa. Na iai lo’u lagona e peisea’i na musumusuina mai a’u e se isi a o o’u tusia le pese, ae le o a’u na tusia. Ou te talitonu e na o le lima minute na tusia ai le pese, ma e le’i toe faia iai ni faasa’osa’oga poo ni fesuia’iga. O isi pese uma na ou tusia, sa fatuina. A o le pese lenei, e pei na pupuna a’e mai se mana e sili atu ia te au. Ou te le’i toe oo lava i ia lagona i aso mulimuli ane na ou tusia ai isi a’u pese ma solo.”

Na ulua’i lomua lenei pese i le mekasini o le *Life and Work* a le Lotu Sikotilani ia Ianuari 1883.

O upu autu o lenei pese, “*O Love That Will Not Let Me Go*”, o le Alofa, Malamalama, Olioli, Satauro. O nei upu ua faatino ai le faamalieina atoatoa o le loto o le tagata faatuatua ua tuuina atoatoa lona tagata e faia le finagalo o le Atua. E matua loloto lava le uiga o nei upu e fa.

Stop Praying and just do it

A farmer whose barns were full of corn was accustomed to pray that the needy be supplied; but when any one in needy circumstances asked for a little of his corn, he said he had none to spare. One day after hearing his father pray for the poor and needy, his little son said to him, “Father, I wish I had your corn.”

“What would you do with it?” asked the father. The child replied, “I would answer your prayer.”

FAASOLOGA FONO TELE 2014

MALUA, ASO 12 - 23 ME

O LE ALOFA, O LE FA'ASINOMAGA LEA O LE EKALEZIA.

“Love, the EFKS Vision and Mission”

“E le sili lava le alofa o se tasi i lenei alofa, ia tu'uina atu e se tasi lona ola mo ana uo.”

[Ioane 15:13]

<u>ASO</u>	<u>TAIMI</u>	<u>KOMITI & SAUNIGA</u>	<u>NOFOAGA</u>
ASO GAFUA 12/05/14	10.00am 7.00am 1.00pm 7.00pm	Komiti Faatonu Asiasiga Komiti o Atina'e Fono Komiti o Atiina'e Lotu Talosaga Au Toeaina <i>Ta'ita'i: Tumama Vili FT</i>	Fale Mafutaga Atina'e Fale Senetenari Fale o Tina <i>Niu Sila i Saute</i>
ASO LUA 13/05/14	8.00am 9.00am 7.00pm	Komiti Au Toeaina Komiti o Aoga Faletua Au Toeaina Komiti Faamisionare	Fale Fono Fale Senetenari Fale o Tina Fale Mafutaga
ASO LULU 14/05/14	8.00am 9.00am 2.00pm 7.00pm	Komiti o Feau Eseese Komiti Au Taumafai TPT: Tautua Puapuaga o Tagata Komiti o Feau Eseese Lotu Au Taumafai <i>Ta'ita'i: Iona Paniani FS</i>	Fale Senetenari Fale Mafutaga Fale o Tina Fale Mafutaga Fale o Tina <i>Aana</i>
ASO TOFI 15/05/14	8.00am 9.00am 3.00pm 1.30pm 7.00pm	Komiti o Tupe Komiti Au Leoleo Lotu Mafutaga Tina Fono Mafutaga Tina TPT. Teine Papauta Tuai Lotu o Nu'u Ese <i>Ta'ita'i: Fa'atausau Onesemo FS</i>	Fale Senetenari Fale Mafutaga Fale o Tina Fale o Tina Fale o Tina Fale o Tina <i>Apia i Sasa'e</i>
ASO FARAILE 16/05/14	5.00am 9.00am 2.00pm 7.00pm	Lotu Au Leoleo <i>Taitai: Moli Moli FS</i> Fono Mafutaga Tina Komiti o Tupe Komiti o Tupe Fono Malua Tuai	Fale o Tina <i>Apia i Sasa'e</i> Fale o Tina Fale Mafutaga Fale Senetenari Fale Senetenari
ASO TOONAI 17/05/14	9.00am	SAUNIGA O LE FAAUUGA <i>Taitai: Popo Su'a FT</i> <i>Faitau Tusi Paia: Eti Tamati FT</i> <i>Tatalo: Asotasi Time FT</i> <i>Faaaelima: Toese P. Toailoa FT</i> <i>Popo Su'a FT</i> <i>Kerita Reupena FT</i> <i>Lucky R. Slade FT</i>	Fale o Tina <i>Niu Sila i Saute</i> <i>Malua</i> <i>Apia i Sasa'e</i> <i>Ta'ita'ifono KAT</i> <i>Niu Sila i Saute</i> <i>Kuiniselani</i> <i>Aukilani</i>

		<i>Tavita Anesone FT</i>	<i>Faleata</i>
		<i>Tautiaga Senara FT</i>	<i>A'ana</i>
		<i>Tu'uina atu o A'oa'o mo le Fa'au'uga:</i>	
		<i>Kerisiano Soti FT</i>	<i>Failautusi KAT</i>
	2.00pm	Lotu mo Tupulaga <i>Ta'ita'i: Luapene Nepo FS</i>	Fale o Tina (<i>Malua</i>)
	7.00pm	TUFA FAILA A USUFONO	Fale Fono
ASO SA 18/05/14	9.00am	LOTU TAEAO/FA'AMANATUGA <i>Ta'ita'i: Peteru Tone FT</i>	Fale Fono (<i>Apia i Sasa'e</i>)
		LOTU TAEAO/FAAMANATUGA <i>Taitai: Senetenari Iupeli FT</i>	Fale o Tina (<i>Niu Sila i Saute</i>)
	6.00pm	LOTU AFIAFI <i>Ta'ita'i: Faapaia Tariu FS</i>	Fale Fono (<i>Faleata</i>)
		LOTU AFIAFI <i>Ta'ita'i: Iakina Alefaio FS</i>	Fale o Tina (<i>Falealili i Sisifo</i>)
<u>19 - 23, USUIA LE FONO TELE</u>			
ASO GAFUA 19/05/14	7.45am	Tapua'iga Amata <i>Ta'ita'i: Tavita Roma FT</i>	(<i>Ta'ita'ifono</i>)
	9.00am	Pepa: Aukilani Tui'ai FS	(Kolisi Faafaifeau Malua)
	10.00am	Taualumaga o le Fono Tele.	
	12.00pm	Malologa mo Taumafataga o le Aoauli.	
	2.30pm	Fa'aaauau Taualumaga o le Fono.	
	5.30pm	Malolo le Fono	
	7.00pm	Pesepesega Fa'aleagaga	
ASO LUA 20/05/14	7.45am	Tapua'iga Amata <i>Ta'ita'i: Mafi Olo'apu FT</i>	(<i>Penisione</i>)
	8.00am	Pepa: Popo Su'a FT	(<i>Au Toeaina</i>)
	9.00am	Taualumaga o le Fono Tele.	
	12.00pm	Malologa mo Taumafataga o le aoauli.	
	2.30pm	Fa'aaauau Taualumaga o le Fono	
	5.00pm	Malolo le Fono	
	7.00pm	Disability (Matagaluega Tina, Atiina'e & Aga Feso'ota'i)	
ASO LULU 21/05/14	7.30am	SAUNIGA ALOAIA MO LE AU PENISIONE <i>Ta'ita'i: Tavita Roma FT</i>	- (<i>Ta'ita'ifono</i>)
	1.45pm	Tapuaiga Amata: <i>Ta'ita'i: Fereti Moenoa FT</i>	- (<i>Penisione</i>)
	2.00pm	Pepa: Rosetta Senetenari	(<i>Mafutaga Tina</i>)
	3.00 pm	Amata Taualumaga o le Fono Tele	
	5.30pm	Malolo le Fono	
	7.00pm	Disability (Faaauau)	
ASO TOFI 22/05/14	7.45am	Tapuaiga Amata <i>Ta'ita'i: Ilai Tupuola FS</i>	(<i>Penisione</i>)
	8.00am	Pepa: (Tiakono) Tuiloma F. Alolua	(<i>Aukilani</i>)

Fesoota'iga i Aso ua Mavae ma nei ona po

Pepa Mafutaga Matagaluega Faleata - 17 Iulai 2013

E le toe faailoa pe fesiligia le aoga ma le taua o fesoota'iga mo le faaleleia o soo se auaunaga ma atina'e eseese i lo tatou Malo, o pisinisi, le Ekalesia ma le atunuu lautele.

O le faanaunauta'iga i soo se malo, o le faia lea o atiina'e e manuia ai ona tagata. Peitai soo se mea lava, e tele itu lelei e maua ai, ae le 'asa lava foi vaega e maua ai faaletonu ma aga e le manuia.

O lenei pepa e aga'i tonu i le autu o le Mafutaga. Faatasi ai ma le faasoa a le Matagaluega ina ia fesoasoani i le mataupu, e aofia ai soliga tulafono i le

faaaogaina o auala o fesoota'iga faa-tekonolosi.

Fesoota'iga i aso ua mavae e oo mai i nei ona po:

O le a taumafai e ootoo atu auala eseese o fesoota'iga amata mai le vai taimi o le 1970 seia oo mai nei, ina ia faigofie ai ona malamalama i suiga.

Matafaioi a le Matagaluega o Fesootaiga ma Faamatalaga Tekonolosi:

Ua manino le matafaioi a lenei matagaluega pei ona faatulagaina ai i le Tulafono o Galuega tau Meli ma

Fesoota'iga 1999. E aofia ai le atina'eina o faiga faavae tau fesoota'iga, tuuina atu o fautuaga tau faiga faavae, mata'ituina o ia faiga faavae, atoa ma le uuna'ia o galuega lelei tau fesoota'iga ma tekonolosi faaneionapo ina ia atina'eina alamanuia mo tagata uma e ala i fesoota'iga aupito lelei.

Faiga Faavae mo mataupu tau Initaneti ma Imeli (Internet and E-mail)

Ua faamaonia e le Komiti Faafoe o Fesoota'iga Faa-tekonolosi le pepa o Faiga Faavae mo Mataupu Tau-Initaneti ma Imeli. O le pepa oloo aiaia ai le faaaogaina tataua e tagata faigaluega uma a le malo, o le auaunaga initaneti ma imeli. O le faamoemoe ia

faaauau itulau e 14

9.00am	Amata Taulumaga o le Fono Tele
12.00pm	Malolo mo Taumafataga o le aoauli
2.30pm	Fa'aaauau taulumaga o le Fono
5.30pm	Malolo le Fono
7.00pm	Feiloaiga Au Toeaina & Aufaigaluega Faifeau.

ASO FARAILE	7.45am	Tapuaiga Amata	
23/05/14		Ta'ita'i: Tavita Roma FT	(Ta'ita'ifono)
	8.00am	Pepa: Fotu Perelini & Au Talavou.	(Manukau)
	9.00am	Amata Taulumaga o le Fono Tele.	

TAUALUMAGA O LE FAASOLOGA O LE FONOTELE:

- 1 Fa'amaonia I'ugafono Fono Tele 2013.**
- 2 Mau Tu'u Sa'o mai Matagaluega.**
- 3 Mau Tu'u Sa'o mai Komiti Tetele e Ono a le Ekalesia:**
- 5 Fa'amaonia Galuega a Komiti.**
 - Komiti o Tupe
 - Komiti o Fe'au Ese'ese
 - Komiti o A'oga
 - Komiti o Atiina'e
 - Komiti Fa'amisionare
 - Komiti Au Toea'ina.
- 6 Palota Sui Ta'ita'ifono.**
- 7 Palota Teutupe**

FAILAUTUSIAOAO

Fesoota'iga i Aso ua Mavae ma nei ona po

mai le itulau e 13

amata mai i le malo, le pulea lelei o le faaaogaina o nei fesoota'iga, ina ia tuuititia ai le tele o faafitauli e aliali mai ai.

O nisi o mataupu oloo iai i lenei faiga faavae e fesoasoani i le faafitauli oloo talanoaina nei e aofia ai le:

* tatalaina ma faasalalau mai o tala mataga mai le initaneti;

* faaaogaina o le gagana masoa ma le tau faamata'u i luga o imeli;

* tatalaina o ata ma tifaga mataga mai le initaneti, teuina, poo le faasalalauina atu o ia ata i nisi tagata faigaluega;

* tusia o faasalalauina ma fe'au faapisinisi taufaasese ma faafoliga, ma faasalalauina atu i nisi tagata mo se faiga e faamanuiaina ai poo se tau'i foi;

* faaaogaina faamalosi o tuatusi imeli a le isi tagata e aunoa ma se faatagaga;

* faaaogaina o taaloga fai tupe ma faasalalau atu i nisi tagata i se faiga faatosina;

* faatupuina ma le faasalalauina o siama vilusi (virus).

Suiga ma Aoga o Telefoni Fe'avea'i

* vave ai ona fesootai aiga i Samoa nei ma atunuu mamao;

* vave ai fesoota'iga i le malo ma pisinisi, Ekalesia ma faalapotopotoga tuma'oti;

* faasaoina le tupe pe a ave le text nai lo le talanoa i le telefoni;

* mafai ona siaki ai paleni o teugatupe;

* siaki ai le tala o le tau mo fuafuaga a le tagata lava ia;

* siaki ai tala fou ma mea o tutupu e le gata i Samoa a o atunuu mamao;

* mafai ona faaaoga mo le auunaga o le mobile money;

* sefe ai le tau malaga mamao mai i Apia ae ua tolo se mataupu;

* vave ai galuega lavea'i i taimi o faalavelave matuia;

* e faamanatu ia te oe le taimi o lau fono poo se sauniga, faapena le kalena;

* e pu'e ai se talanoaga ma pu'e ai ata;

* o le moli uila pe a pe le eletise.

Solitulafono i luga o Fesoota'iga faa-tekonolosi (cybercrime)

O ia soli tulafono oloo faatinoina e nisi o tagata e faaaogaina ai fesoota'iga vavave faatekonolosi e ala i masini komepiuta, initaneti, telefoni feavea'i, ma nisi lava masini faaneionapo mo fesoota'iga i leo, ata, ma upu.

SPAM (unsolicited E-mails)

Ole spam ua faamatalaina o ni feau tusitusia taufaasese i luga o telefoni ma masini komipiuta, e faaaogaina ai fesootaiga initaneti. Ma o se gaoioiga faasolitulafono ua aafia ai nisi o tagatanuu o Samoa. Ua molimau mai nisi kamupani lafo tupe i totonu o le atunuu, le faaseseina pea o tatou tagata i nei meli taufaasese, ma ua leiloa atu ai tupe a nisi.

O le fautuaga faigofie, a maua se feau faapea, titina loa, aua e le o ni mea moni. Pe sau i lau telefoni poo lau imeli, o le tuu lava i le lapisi le tali vave. Manaia le feau faalauiloa a le Western Union i luga o le leitio 2AP e uiga i feau tau faasese fai mai ua e malo i se Lotto, ae e te

le'i taalo ai lava.

Aafiaga ona o Suiga:

O solitulafono e faaaogaina ai faiga faatekonolosi ua aafia ai tupulaga aemaise o le fanauti. O lenei faafitauli ua matauina lona faatupula'ia ma ua aafia ai le siosiomaga saogalemu o le va nonofo ai o aiga aemaise o le va o matua ma fanau. O le mea moni, ua tele se aafiaga o aga fesoota'i talu fesuia'iga o fesoota'iga. O isi ua lelei ona o le faaaoga tatau mo mea e aoga mo le aiga, galuega faapea a'oa'oga. Peitai o nisi, ua matua faaletonu lava ona ua le lelei ona faaaoga ma le fuafua lelei ma ua afaina ai le olaga i aso fai soo.

Nisi o amioga ma aga ua matauina:

* tatagi o telefoni ma tali i taimi o tapua'iga;

* tatagi o telefoni a o fai se sauniga poo se fonotaga;

* free text a kamupani telefoni ua faaalu ai le taimi o fanau ae le faia suesuega ma mea a'oga;

* ua nana pe gaoi e fanau tupe mo credit, e-charge ma top up;

* ua fiafia fanau e pu'e ata ma faasalalau i uo, aemaise le taugofie o nisi telefoni e mafai ona maua ai le initaneti;

* o text ma suaga ua i'u ai ina tutupu ai vevesi ma misa i le va o aoga;

* ua fai ma vaisu a nisi le facebook ua pei se mea e malolo iai i taimi uma, ae galo ai ua lafo ni tala sa le tatau ona tuuina i luga o upega o faamatalaga.

(O lenei pepa na saunia e le Susuga Lealiiee Tapuai Mautanoa Tua'imalo Asamu Ah Sam, OFISA SILI O PULEGA. Oloo ua lolomi atoa atu nisi vaega o le pepa na fai, ae oloo ootoo atu nisi vaega).

Ue! o le 'oti - 'Ai a oso - Ina oso ia!

lea ua lauiloa ai lea tusi i nei tausaga e tele talu ona lomua ua sili ma le selau tausaga talu ai, a o lona igoa moni lava - "Ole Tusi a Tamaiti".

Ou te ofo lava a'u i tala malie na filifilia e misionare ma o tatou tua'a i na aso o le popogi o le taeao o le Tala Lelei. Ou te manatua lelei lava e a'u lo'u matua fiafia e faitau tala oi le Tusi Oti. A o le faitauina o ia tala, o le a'oina lava lea o le gagana tusitusi ma faitau tusi a tamaiti, poo tagata Samoa.

O tala i mea masani, ma taatele. E pei o le tala oloo i le amataga o le Tusi Oti: - "Ua alu a'e le la. Ina sau ia 'oe. Ua sau nei le paa mai le lua. Ua gau le vae o le moa. O fua mai le vao e 'ai ai. Ua loa ona sau o ia."

Ma le tala la i le 'oti le manu e le maua i Samoa ae o lea ua igoa ai lava le tusi ona o le fiafia o tagata e faitau ai: Ue! o le 'oti. O le a

oso foi o ia. Pe oso 'ea le 'oti? Ioe, e oso. E oso i le lua, e oso foi i le pa. Poo a mea na te 'ai ai? E 'ai e ia lau vao. E inu foi o ia i le vai. A 'uma ona 'ai a 'uma ona inu fo'i, ona oso atu lea o ia i lea mea ma lea mea. Ua tu nei le i'u. Ai a oso. Ina oso ia!

Matua manaia lava le tala faa-koniseti a teine Papauta lea e fai i le tama'i pusi lea e nofonofo mai i le Tusi 'Oti. A miao le pusi a teine Papauta, ua fia tagi faapusi uma atu ai lava ma le 'au maimoa. Fai mai le tala oloo i le Tusi 'Oti:

O le pusi lena ua nofo mai. Ua nofo o ia i luga o le fala. E peti fo'i le pusi; aua ua ia 'ai imoa, pe a sau se tasi i le mea o iai o ia.

Popole lava le pulega o a'oa'oga i Samoa ona o le faaletonu o le gagana Samoa a tamaiti. Ae iai lo'u talitonuga, a fo'i a'oga e toe amata mai i le Tusi 'Oti, ma faa'oga le Tusi 'Oti, ma 'aue le

manatu mama i le Tusi 'Oti, e vave lava ona faaleleia le Gagana Samoa a fanau a le atunuu.

Manaia foi le faiga lea e ta'u o le *multiple choice*, lea e tusi mai ai ni fesili ma aumai ai ma o latou tali i lalo o se tala. E faitau le tamaitiiti i le tala, ona vaai lea i fesili ua tuu mai lalo o le tala, ma tali pe fa pe tolu o se fesili, ona filifili lea e le tamaitiiti le tali sa'o ma ia faasa'oina e faailoa ai le tali ua ia manatu o le tali sa'o lea o le fesili. E faigofie tele lea faiga mo faia'oga, ona e le tau faitau ai ni tali e tusia e le tamaitiiti lava ia, ma alu ai le tele o le taimi.

A o le faalavelave, ua ave'ese ai le avanoa mo le tamaitiiti e faamatala ai i ana lava upu le tali o le fesili, ma aveva ma mea e a'oa'o, ma lelei ai, lana gagana.

Afemata T. Apelu Aiavao

Faatonu Sulu Samoa

O le Koniseti a Fetu o le Taeao ma Agelu

mai le itulau muamua amana'iaina.

O le koniseti ua ta'ua, o pesega ia na faia i le taimi o le foafoaga. O le 'aufaipese na tuu faatasi ai le 'au agelu ma fetu o le taeao. Tatou te le iloa upu o a latou pese, poo a latou viiga. Tasi le mea tatou te iloa, na alalaga ma le fiafia ma olioli i latou. Tafefe i le leo tetele o pesega! Tatou te le iloa foi pe to'a fia le aofa'i o agelu, peitai sa fetalai Iesu i le to'a sefulu afe o i latou. Afai o le toatele lena, ae le taulia ai fetu, tafefe i se pese ina a leo tele! Tafefe i le fetalai'i o le lafoia mai le isi tafa'ilagi i le isi tafa'ilagi!

Fai mai le afioga a le Atua ia Iopu e pei ona tusia i le Iopu 38:2-7: "O

ai ea lenei ua na faapouliuligia la'u pule i upu e le o iai le potu? Ina fusi ia lou sulugatiti e pei o le tagata malosi; ou te fesili atu foi ia te oe, ina faailoa mai ia ia te a'u. O i fea sa e iai ina o o'u faavaeina le lalolagi? Ina faaali mai ia pe afai ua e iloa mafaufau. O ai ea na ia fuafuaina ai, pe afai ua e iloa? O ai foi ua na faata'oto iai le fua? Ua tuuina ea ona faavae i luga o le ea? O ai ea foi na na tuuina ifo lona maa tulimanu; *ina o pepese faatasi fetu o le taeao, ma alalaga fiafia atalii uma o le Atua.*"

Ae le na o le pepese le mea e lauiloa ai le au agelu. O i latou foi o avefe'au a le Atua, ma a tatou agelu tausii. E ifo i latou ma tapua'i i le Atua, ma faia lona finagalo. E

le iloa lava e le toatele, ae iai i latou i faiga malo; e fesoasoani i Ekalesia, e tau'i atu foi ia i latou o fili o le Atua. Oloo ta'ua ia galuega uma a le 'au agelu i le Tusi Paia: (Neemia 9:6; Salamo 34:7; 103:20; Faaaliga 1:1; 2:1; 16:1. A o le mea e aupito sili ona lauiloa ai le 'au agelu, o musika. O le pepese. O a latou pesega!

I le taimi o le taeao popogi o le foafoaga, sa pepese faatasi ai le 'au agelu ma fetu. Ina ua folafola mai foi e le Atua lana foafoaga fou, o le fanau mai lea o Keriso, sa pepese ai foi agelu. E faaalii mai ai iinei, le fiafia o le 'au agelu e pepese ma faailoa atu ia latou pesega, foafoaga fou e faia e le Atua. Na ta'ua foi e Iesu le isi taimi na pepese ai le 'au agelu. Na ia faaupu faapea: "Ou te fai atu ia te outou, ua faapea le olioli i luma o agelu a le Atua, ona o le tagata agasala e toatasi ua salamo." -

faaauau itulau e sosoo ai

O E UA MALILIU

Faafua Faamaile Semua Ierome

3 Mati 1924-13 Tesema 2013


Ia e faamaoni seia oo i le oti, ona ou avatu ai lea ia te oe o le pale o le ola (Faaaliga 2:10)

O le tiakono tamaitai, a o le tina matua o le EFKS, Grey Lynn. Na soifua mai Faamaile i le aso 3 o Mati 1924, ae faamalolo e lona Matai i le aso 13 o Tesema 2013. E to'a ono ona uso, ae toatasi lona tuagane, o ia o le ulumatua o le fanau. O le 1972 na malaga mai ai i Niu Sila, ma faaee lona tofi tiakono i le Ekalesia i Grey Lynn. E to'alua lana fanau, o Leinati Faualo Nomani ma Semua Momo'e.

O Faamaile o se tasi o toe ulutaia i totonu o le matou Ekalesia. Mai le amataga o le ma galuega faafaifeau i Grey Lynn, ou te le iloa se taimi na ou le vaai ai i se sauniga lotu i Aso Sa. Pau le Aso Sa na ou le vaai ai ia Faamaile, o le taimi na faata'otolia ai i le falema'i, ma amia ai e lona Matai.

O Faamaile o se poutu toa o le matou galuega. O se matafale

galue malosi, e taulamua i soo se mea e fai a le aulotu. E fiafia Faamaile e foa'i mo le Alii ma fai mea sili mo lana Ekalesia. Poo le a se umi o se matou fono faaleaulotu, e nofo mai lava Faamaile. I taimi malulu e faatutugata ai le toatele, e le faavaivai Faamaile. O se tina tausaaafia ma loto alofa, aemaise le pele ia te ia o fanau a le aulotu. O le a misia e le A'oga Aso Sa aua e auai mai lava i mea e fai a le A'oga Aso Sa, aemaise le Lotu a Tamaiti. E agalelei ma faaaloalo i le faifeau ma lona toalua. O lona toe sauniga na faia lava i le malumalu o lana Ekalesia sa tautua ai i Grey Lynn, i le aso 19 Tesema 2013. O le Susuga Fiatepa Faaee FT sa taitai, Susuga Iosefa Rimoni FS na faaulufaleina lona sa, Susuga Fuatai Misaita FS na faitauina le Tusi Paia, ma le Susuga Vagatai Vaelua FS na tatalo. O molimau na saunia e le Susuga Faamalua Peteru, faapea le Susuga i le Faifeau Toeaina Penisione, Laau Ioritana Tanielu. Na sosoo ai ma le molimau a le Afioga ia Faaolotoi Fatialofa Reupena Pogi, le Konesula o le Malo Samoa i Aukilani, Niu Sila. Na molimau



le Afioga i le Tiakono Tamaitai ia Leinati Faualo Nomani faapea ma Semua Momo'e e fai ma sui o le fanau, ona faaii lea i la'u molimau i lona soifua tautua i le Ekalesia. O le upu faamafanafana na saunoa ai le Susuga Fetuliaina Pama AM ma faaopoo le taitai. Ona ou faaiuina ai lea o ona toe sauniga i lona nofoaga mau i le Waikumete Cemetery Grounds, Glen Eden.

Le auauna lelei e ma le faamaoni, ulufale mai ia i le fiafia o lou Alii.

Faamafanafana le Agaga o le Atua i le Konesula ma le paia o aiga, faapea le Ekalesia i Grey Lynn.

Peniamina Leota FS

O le Koniseti a Fetu o le Taea o ma Agelu

Luka 15: 10.

Ae fai mai le Salamo e 19:1-4: "Ua tala mai e le lagi le mamalu o le Atua; ua faaaliga foi e le vanimonimo le galuega a ona aao. Oloo ta'u atu le upu e le tasi aso i le tasi aso, oloo faaaliga foi le potu e le tasi po i le tasi po. E leai se gagana, e leai foi ni upu, e le lagona o latou leo. Ua oo atu lo latou leo i le lalolagi uma lava, ma a latou upu i tulu'iga o le atu laulau." ###

O le Silafaga a le Alii

Salamo 139: 13-16; 23-24:

O le Salamo a Tavita

Auā sa ia te oe o'u manatunatu; na e ufiufi ia te a'u i le manava o lo'u tina. Ou te vivii atu ia te oe, aua na faia a'u e ala ai ona mata'utia ma ofo tele ai; o mea na e faia o mea mamana ia; ua ou matua iloa e a'u nei mea; e le'i lilo lo'u tino ia te oe, ina ua faia a'u i le mea lilo, ina ua saunia a'u i mea loloto i le lalolagi. Na silasila mai ou fofoga i o'u tino uma ina o afuafua; ua tusia foi uma lava i lau tusi, o ona aso foi na faia ai, a o leai ni o'u tino..... Le Atua e, ia e su'esu'e mai ia te a'u, ma ia e silafia lo'u loto; tofotofo mai ia te a'u, ma ia e silafia o'u manatunatu; ma ia e silafia poo ia te a'u se ala e tiga ai; ma ia e ta'ita'iina mai a'u i le ala o le faavavau.

(O le mataupu lenei o le Salamo e aupito sili ona fiafia iai le Ao Mamalu o le Malo - Afioga Tui Atua Tupua Tamasese Efi)